

摘藻堂四庫全書薈要

集部

欽定四庫全書薈要

集部

樂城應詔集卷一
四至

詳校官助教臣常循



欽定四庫全書薈要卷一萬五千八十

集部

樂城應詔集卷一

宋 蘇轍 撰

進論五首

夏論

聖人之道苟可以安於天下不求夫為異也堯舜傳之賢而禹傳之子天下以為禹無聖人而傳之而後授之其子孫也夫聖人之於天下不從其所安而為之而求異夫天下之人何其用心之淺邪昔者湯有伊尹武王

有周公而周公文王之子武王之弟也湯之太甲武之成王皆可以為天下而湯不以與其臣武王不以與其弟誠以為其子之才不至於亂天下者則無事乎授之他人而以為異也而天下之人何獨疑夫禹哉今夫人之愛其子是天下之通義也有得焉而思以與其子孫人情之所皆然也聖人以是為不可易故從而聽之使之父子相繼而無相亂以至於堯堯舉其天下而授之舜舜得堯之天下而又授之禹舉天下而授之人此聖

人之所以大過人而天下後世之所不能也天下後世之所不能而聖人獨為之豈以為異哉夫天下之人不能皆賢而有異人焉為異而震之則天下皆將喜其名而失其真故夫堯舜之傳賢者是不得已而然也使堯之丹朱舜之商均僅可以守天下而堯肯傳之舜而舜肯傳之禹以為異而疑天下哉然則禹之不以天下授益非以益為不足授也使天下復有禹而愚知禹不以天下授之矣何者啓足以為天下故也啓為天下而益

為之佐是益不失為伊尹周公而其功猶可以及天下也蓋聖人之不喜異也如此昔者嘗聞之魯人之法贖人者受金於府子貢贖人而不受賞夫子嘆曰嗟夫使魯之不復贖人者賜也夫贖人而不以為功此君子之所以異於衆人者而其弊乃至於不贖是故聖人不喜為異以其有時而窮也閔子終三年之喪見於夫子援琴而歌戚戚而不樂子夏取琴而鼓之其樂衍衍然作而曰先王制禮不敢不及也而夫子皆以為賢由此觀

之聖人之行豈求勝夫天下之人哉亦有所守而已矣

商論

商之有天下者三十世而周之世三十有七商之既衰而復興者五王而周之既衰而復興者宣王一人而已蓋商之多賢君宜若其世之過於周而反不如周之賢君不如商之多而其久於商者乃數百歲也此二者所以使天下之人疑焉而不知其故也蓋常以為周公之治天下務為文章繁縟之禮以和柔馴擾天下剛強之

民故其道本於尊尊而親親貴老而慈幼使民之父子
相愛而兄弟相悅以無犯上難制之氣行其至柔之道
以揉天下之戾心而去其剛毅勇果之政故其享天下
至久而諸侯內侵京師不振卒於廢爲至弱之國何者
優柔和易之道可以爲久而不可以爲強也若夫商人
所以爲天下者不可復見矣竊常求之於詩書之間見
夫詩之寬緩而和柔書之委曲而繁重者舉皆周也而
商人之詩駿發而嚴厲其書簡潔而明肅以爲商人之

風俗蓋在乎此矣夫惟天下之有剛強不屈之俗也故其後世有以自振於衰微然至於其敗也一散而不可復止故夫物之强者易以折而柔忍者可以久存柔者可以久存而常困於不勝强者易以折而其末也乃可以有所立且此非聖人之罪也物莫不有所短方其盛也長用而短伏及其衰也長伏而短見夫聖人惟能就其所長而用之也是故當其盛時天下惟其長之知而不知其短之所在及其後世用之不當其長日已消亡

而短日出故夫能久者常不能強能以自奮者常不能
久此商之所以不長而周之所以不振也嗚呼聖人之
慮天下亦有所就而已蓋不能使之無弊也使之能久
而不能強能以自奮而不能以及遠此二者存乎其後
世之賢與不賢也故太公封於齊尊賢而尚功周公曰
後世必有篡奪之臣周公治魯親親而尊尊太公曰後
世寢衰矣夫尊賢尚功則近於強親親尊尊則近於弱
終於齊有田氏之禍而魯人困於盟主之令蓋商之政

近於齊而周公之所以治周者其所以治魯也故齊強而魯弱魯未亡而齊亡也

周論

傳曰夏之政尚忠商之政尚質周之政尚文而仲尼亦云周監於二代郁郁乎文哉吾從周愚讀詩書歷觀唐虞至於商周蓋嘗以為自生民以來天下未嘗一日而不趨於文也文之為言猶曰萬物各得其理云爾父子君臣之間兄弟夫婦之際此文之所由起也昔者生民

之初父子無義君臣無禮兄弟不相愛夫婦不相保天下紛然而淆亂忿鬪而相苦文理不著而人倫不明生不相養死不相葬天下之人舉皆戚然有所不寧於其心然後反而求其所安屬其父子而列其君臣聯其兄弟而正其夫婦至於虞夏之世乃益去其鄙野之制然猶以天子之尊而飯土塹啜土飴土堦三尺茹茨而不剪至於周而後大備其粗始於父子之際而其精布於天下其用甚廣而無窮蓋其當時莫不自以為文於前

世而其後之人乃更以為質也是故祭祀之禮陳其饔
豆列其鼎俎備其醪醴俯伏以薦思其飲食醉飽之樂
而不可見也於是灌用鬱鬯藉用白茆既沃而莫之見
以為神之縮之也體魄降於地魂氣升於天恍忽誕謾
而不知其所由處聲音氣臭之類恐不能得當也於是
終祭於屋漏繹祭於祊以為人子之心無所不至也薦
之以滋味重之以膾炙恐鬼神之不肖也薦之以血毛
重之以醴薦恐父祖之不吾安也於是先黍稷而後稻

梁先大羹而後庶羞以為不敢忘禮亦不敢忘愛也丁寧反覆優游而不忍去以為可以盡人子之心而人子之心亦可以少安矣故凡世之所謂文者皆所以安夫人之所不安而人之所安者事之所當然也仲尼區區於衰周之末收先王之遺文而與曾子推論禮之所難處至於毫釐纖悉之際蓋以為王道之盛其文理當極於此焉耳及周之亡天下大壞強凌弱衆暴寡而後世乃以為用文之弊夫自唐虞以至於商漸而入於文至

於周而文極於天下當唐虞夏商之世蓋將求周之文
而其勢有所未至非有所謂質與忠也自周而下天下
習於文非文則無以安天下之所不足此其勢然也今
夫冠婚喪葬而不為之禮墓祭而不廟室祭而無所仁
人君子有所不安於其中而曰不文以從唐虞夏商之
質夫唐虞夏商之質蓋將以求周之文而未至者非所
以為法也

六國論

愚讀六國世家竊怪天下之諸侯以五倍之地十倍之衆發憤西向以攻山西千里之秦而不免於滅亡常為之深思遠慮以為必有可以自安之計蓋未嘗不咎其當時之士慮患之疎而見利之淺且不知天下之勢也夫秦之所與諸侯爭天下者不在齊楚燕趙也而在韓魏秦之有韓魏譬如人之有腹心之疾也韓魏塞秦之衝而蔽山東之諸侯故夫天下之所重者莫如韓魏也昔者范雎用於秦而收韓商鞅用於秦而收魏昭王未

得韓魏之心而出兵以攻齊之剛壽而范雎以為憂然則秦之所忌者可以見矣秦之用兵於燕趙秦之危事也越韓過魏而攻人之國都燕趙拒之於前而韓魏乘之於後此危道也而秦之攻燕趙未嘗有韓魏之憂則韓魏之附秦故也夫韓魏諸侯之障而使秦人得出入於其間此豈知天下之勢邪委區區之韓魏以當強虎狼之秦彼安得不折而入於秦哉韓魏折而入於秦然後秦人得通其兵於東諸侯而使天下遍受其禍夫韓

魏不能獨當秦而天下之諸侯藉之以蔽其西故莫如
厚韓親魏以擯秦秦人不敢逾韓魏以窺齊楚燕趙之
國而齊楚燕趙之國因得以自安於其間矣以四無事
之國佐當寇之韓魏使韓魏無東顧之憂而爲天下出
身以當秦兵以二國委秦而四國休息於內以陰助其
急若此可以應夫無窮彼秦者將何爲哉不知出此而
乃貪疆場尺寸之利背盟敗約以自相屠滅秦兵未出
而天下諸侯已自困矣至使秦人得間其隙以取其國

可不悲哉

秦論

秦人居諸侯之地而有萬乘之志侵辱六國斬伐天下
不數十年之間而得志於海內至其後世再傳而遂亡
劉季起於匹夫斬艾豪傑蹙秦誅楚以有天下而其傳
子孫數十世而不絕蓋秦漢之事其所以起者不同而
其所以取之者無以相遠也然劉項奮臂於閭閻之中
率天下蜂起之兵西嚮以攻秦無一成之聚一夫之衆

驅罷弊適戍之人以求所非望得之則生失之則死以
匹夫而圖天下其勢不得不疾戰以趨利是以冒萬死
求一生而不顧今秦擁千里之地而棄累世之業雖閉
關而守之畜威養兵拊循士民而諸侯誰敢謀秦觀天
下之釁而後出兵以乘其弊天下夫誰敢抗而惠文武
昭之君乃以萬乘之資而用匹夫所以圖天下之勢疾
戰而不顧其後此宜其能以取天下而亦能以亡之也
夫劉項之勢天下皆非吾有起於草莽之中因亂而爭

之故雖馳天下之人以爭一旦之命而民猶有待於戡
定以息肩於此故以疾戰定天下天下既安而下無背
叛之志若夫六國之際諸侯各有分地而秦乃欲以力
征彊服四海不愛先王之遺黎第為子孫之謀而竭其
力以爭隣國之利六國雖滅而秦民之心已散矣故秦
之所以謀天下者匹夫特起之勢而非所以承祖宗之
業以求其不失者也昔者嘗聞之周人之興數百年而
後至於文武文武之際三分天下而有其二然商之諸

侯猶有所未服紂之衆未可以不擊而自解也故以文
武之賢退而修德以待其自潰誠以為后稷公劉太王
王季勤勞不懈而後能至於此故其發之不可輕而用
之有時也嗟夫秦人舉累世之資一用而不復惜其先
王之澤已竭於取天下而尚欲求以為國亦已惑矣

樂城應詔集卷一

欽定四庫全書薈要卷一萬五千八十一

集部

樂城應詔集卷二

宋 蘇轍 撰

進論五首

漢論

古之聖人制為君臣之分天子以其一身立乎天下之上安受天下之奉已而不辭天下之人奇才壯士爭出其力自盡於天子之下而無所逃遁此二者何為如此也天下之事固其賢者為之也仁人君子盡其心以制

天下之事而無所不成武夫猛士竭其力以剪天下之
暴亂而無所不定此其類非不智且勇也然而不得其
君則其心常鯁鯁然曠四海而不能以自安功成事立
缺然反顧而莫之能受是以天下之賢才其才雖足以
取之而常喜天下之有賢君者利其有以受之也蓋古
之人君收天下之英雄而不失其心故天下皆爭歸之
而英雄之士因其君之資以用力於天下功成求得而
不敢為背叛之操故上下相守而可以至於無窮惟其

君臣相戾而不能以相用君以為無事乎其臣臣以為
無事乎其君君無所用以至於天下之不親臣無以用
之以至於惇惇而無所底麗而天下始大亂矣且彼不
知夫天下之意也天下之人皆人臣也而誰能以相從
惟其因天子之權而用之是以雖其比肩之人而莫敢
抗彼見天下之莫吾抗也則以為天下之畏我而不知
己之戴君之威而行也故或狃天下之畏己而反以求
去其君其君既去而天下之人孰畏而不為變哉昔者

西漢之衰王莽竊取其人君之權而執之以求取其天下方其執之而未取也天下不知其將取之是以俛首而奉其所為何者天下之心猶以為漢役之也至於天下在莽而其英雄之士遂起而共攻之不數年而莽以大敗何者天下不服無漢之王莽也其後東漢之亂獻帝奔走於草莽之中曹操出之以為帝王當是之時天下已無漢矣而唯曹氏之為聽然天下之英雄猶以為名皆起而爭之終曹公之身而不能以自安猶幸其當

時之人皆知漢之天下已去而操收之也是以心服曹氏而安為之臣故孔子曰天下有道禮樂征伐自天子出天下無道禮樂征伐自諸侯出自諸侯出蓋十世希不失矣自大夫出五世希不失矣陪臣執國命三世希不失矣蓋天下之情居下而干其上之政者以為己之享其利也而不知天下之爭心皆將囂然而不平是以其素所服者愈狹則其失之也愈速何則其不平者衆也故曰祿之去公室五世矣政在大夫四世矣而三桓之

子孫微矣嗚呼公室既微則三桓之子孫天下之所謂
宜盛者也而終以衰弱而不振則夫君臣之分可知也
已

三國論

天下皆怯而獨勇則勇者勝皆闇而獨智則智者勝勇
而遇勇則勇者不足恃也智而遇智則智者不足用也
夫惟智勇之不足以定天下是以天下之難蜂起而難
平蓋嘗聞之古者英雄之君其遇智勇也以不智不勇

而後真智大勇乃可得而見也悲夫世之英雄其處於
世亦有幸不幸邪漢高祖唐太宗是以智勇獨過天下
而得之者也曹公孫劉是以智勇相遇而失之者也以
智攻智以勇擊勇此譬如兩虎相捋齒牙氣力無以相
勝其勢足以相擾而不足以相斃當此之時惜乎無有
以漢高帝之事制之者也昔者項籍乘百戰百勝之威
而執諸侯之柄咄嗟叱吒奮其暴怒西向以逆高祖其
勢飄忽震蕩如風雨之至天下之人以為遂無漢矣然

高帝以其不智不勇之身橫塞其衝徘徊而不進其頑
冒椎魯足以為笑於天下而卒能摧折項氏而待其死
此其故何也夫人之勇力用而不已則必有所耗竭而
其智慮久而無成則亦必有所倦怠而不舉彼欲就其
所長以制我於一時而我閉而拒之使之失其所求遂
巡求去而不能去而項籍固已敗矣今夫曹公孫權劉
備此三人者皆知以其才相取而未知以不才取人也
世之言者曰孫不如曹而劉不如孫劉備惟智短而勇

不足故有所不若於二人者而不知因其所不足以求勝則亦已惑矣蓋劉備之才近似於高祖而不知所以用之之術昔高祖之所以自用其才者其道有三焉耳先據勢勝之地以示天下之形廣收信越出奇之將以自輔其所不逮有果銳剛猛之氣而不用以深折項籍猖狂之勢此三事者三國之君其才皆無有能行之者獨有一劉備近之而未至其中猶有翹然自喜之心欲為椎魯而不能純欲為果銳而不能達二者交戰於中

而未有所定是故所為而不成所欲而不遂棄天下而
入巴蜀則非地也用諸葛孔明治國之才而當紛紜征
伐之衝則非將也不忍忿忿之心犯其所短而自將以
攻人則是其氣不足尚也嗟夫方其奔走於二袁之間
困於呂布而狼狽於荊州百敗而其志不折不可謂無
高祖之風矣而終不知所以自用之方夫古之英雄唯
漢高帝為不可及也夫

晉論

御天下有道休之以安動之以勞使之安居而能勤逸處而能憂其君子周旋揖讓不失其節而能耕田射馭以自致其力平居習為勉強而去其情傲厲精而日堅勤勞而日彊冠冕佩玉之人而不憚執天下之大勞夫是以天下之事舉皆無足為者而天下之匹夫亦無以求勝其上何者天下之亂蓋嘗起於上之所憚而不敢為天下之小人知其上之有所憚而不敢為則有以乘其間而致其上之所難夫其上之所難者豈非死傷戰

鬪之患匹夫之所輕而士大夫之所不忍以其身試之者邪彼以死傷戰鬪之患邀我而我不能應則無怪乎天下之至於亂也故夫君子之於天下不見其所畏求使其所畏之不見是故事有所不辭而勞苦有所不憚昔者晉室之敗非天下之無君子也其君子皆有好善之心高談揖讓泊然冲虛而無慷慨感激之操大言無當不適於用而畏兵革之事天下之英雄知其所忌而竊乘之是以顛沛隕越而不能以自存且夫劉聰石勒

王敦祖約此其姦詐雄武亦一世之豪也譬如山林之
人生於草木之間大風烈日之所咻而霜雪饑饉之所
勞苦其筋力骨節之所嘗試者亦已至矣而使王衍王
導之倫清談而當其衝此譬如千金之家居於高堂之
上食肉飲酒不習寒暑之勞而欲以之捍禦山林之勇
夫而求其成功此固姦雄之所樂攻而無難者也是以
雖有賢人君子之才而無益於世雖有盡忠致命之意
而不救於患難此其病起於自處太高而不習天下之

辱事故富而不能勞貴而不能治蓋古之君子其治天下為其甚勞而不失其高食其甚美而不棄其糲使匹夫小人不知所以用其勇而其上不失為君子至於後世為其甚勞而不知以自復而為秦之彊食其甚美而無以自實而為晉之敗夫甚勞者固非所以為安而甚美者亦非所以自固此其所以喪天下之故也哉

七代論

英雄之士能因天下之勢而遂成之天下之勢未有可

以必成者也而英雄之士常因其隙而入於其間堅忍而不變是以天下之勢遂成而不可解自晉以下天下何其紛紛也彊者不能以相吞而弱者不能以相服其德不足以相君臣而其兵不足以相吞滅天下大亂離而為南北北又離而為東西其君臣又自相篡取而為七代至於隋而後合而為一蓋其間百有餘年之中其賢君名臣累累而出者不為少矣然而南不能渡河以有北之民而北不能過江以侵南之地豈其百年之間

南無間之足乘而北無隙之可入哉蓋亦其勢之有所不可者也七代之際天下嘗有變矣宋取之晉齊取之宋梁取之齊陳取之梁而周齊取之後魏此五釁者兵交而不解內亂而無救其間非小也而其四隣拱手遠望而莫敢入蓋其取之者誠有以待之而不可以乘其倉卒也嗟夫北方之人其力不足以并南而南方之勢又固不可以爭衡於中國則七代之際天下將不可合邪嘗試論之姚泓宋武之際天下將合之際也姚興既

死而秦地大亂武帝舉江南之兵長驅以攻秦兵不勞而關中定此天下之一時也及夫劉穆之死關中未安席不及煖兵不及息而奔走以防江南之亂留孺子孱將以抗四方彊悍之虜則天下之勢已遂去矣且此唯不能因天下之勢而遂成之也則夫天下之勢亦隨去之而已矣且夫孫權曹操之事足以見矣曹操之不能過江以攻孫權力有所未足也而孫權終莫肯求逞於中國蓋其志將以僥倖乎北方之大亂然後奮而乘其

弊而非以為其地之足以抗衡於中原也嗟夫使武帝
既入關因而居之以鎮撫其人民南漕江淮之資西引
巴漢之粟而內因關中之盛厲兵秣馬以問四方之罪
戾當此之時天下可以指麾而遂定矣而何江南之足
以蒂芥夫吾心哉然而其事則不可以不察也其心將
有所取乎晉而恐夫人之反之於南是以其心憂懼顛
倒而不見天下之勢孔子曰無欲速無見小利欲速則
不達見小利則大事不成故夫有可以取天下之勢而

不顧以求移其君而遂失之者宋武之罪也

隋論

人之於物聽其自附而信其自去則人重而物輕人重而物輕則物之附人也堅物之所以去人分裂四出而不可禁者物重而人輕也古之聖人其取天下非其驅而來之也其守天下非其劫而留之也使天下自附不得已而為之長吾不役天下之利而天下自至夫是以去就之權在君而不在民是之謂人重而物輕且夫吾

之於人已求而得之則不若使之求我而後從之已守而固之則不若使之不忍去我而後與之故夫智者或可與取天下矣而不可與守天下守天下則必有大度者也何者非有大度之人則常恐天下之去我而以術留天下以術留天下而天下始去之矣昔者三代之君享國長遠後世莫能及然而亡國之暴未有如秦隋之速二世而亡者也秦隋之亡其弊果安在哉自周失其政諸侯用事而秦獨得山西之地不過千里韓魏壓其

衝楚脅其肩燕趙伺其北而齊掉其東秦人被甲持兵
七世而不得解寸攘尺取至始皇然後合而為一秦見
其取天下若此其難也而以為不急持之則後世且復
割裂以為敵國是以銷名城殺豪傑鑄鋒鏑以絕天下
之望其所以備慮而固守之者甚密如此然而海內愁
苦無聊莫有不忍去之意是以陳勝項籍因民之不服
長呼起兵而山澤皆應由此觀之豈非其重失天下而
防之太過之弊歟今夫隋文之世其亦見天下之久不

定而重失其定也蓋自東晉以來劉聰石勒慕容苻堅姚興赫連之徒紛紛而起者不可勝數至於元氏并吞滅取畧已盡矣而南方未服元氏自分而為周齊周并齊而授之隋隋文取梁滅陳而後天下為一彼亦見天下之久不定也是以全得天下之衆而恐其失之享天下之樂而懼其不久立於萬民之上而常有猜防不安之心以為舉世之人皆有曩者英雄割據之懷制為嚴法峻令以杜天下之變謀臣舊將誅滅畧盡而獨死於

楊素之手以及於大故終於煬帝之際天下大亂塗地而莫之救由此觀之則夫隋之所以亡者無以異於秦也悲夫古之聖人修德以來天下天下之所為去就者莫不在我故其視失天下甚輕夫惟視失天下甚輕是故其心舒緩而其為政也寬寬者生於無憂而慘急者生於無聊耳昔嘗聞之周之興太王避狄於岐豳之人民扶老攜幼而歸之岐山之下累累而不絕喪失其舊國而卒以大興及觀秦隋唯不忍失之而至於亡然後

知聖人之為是寬緩不速之行
者乃其所以深取天下者也

樂城應詔集卷二

欽定四庫全書薈要卷一萬五千八十二

集部

樂城應詔集卷三

宋 蘇轍 撰

進論五首

唐論

天下之變常伏於其所偏重而不舉之處故內重則為
內憂外重則為外患古者聚兵京師外無彊臣天下之
事皆制於內當此之時謂之內重內重之弊姦臣內擅
而外無所忌匹夫橫行於四海而莫之能禁其亂不起

於左右之大臣則生於山林小民之英雄故夫天下之重不可使專在內也古者諸侯大國或數百里兵足以戰食足以守而其權足以生殺然後能使四夷盜賊之患不至於內天子之大臣有所畏忌而內患不作當此之時謂之外重外重之弊諸侯擁兵而內無以制由此觀之則天下之重固不可使在外而亦不可使在內也自周之衰齊晉秦楚縣地千里內不勝於其外以至於滅亡而不救秦人患其外之已重而至於此也於是收

天下之兵而聚之關中夷滅其城池殺戮其豪傑使天下之命皆制於天子然至於二世之時陳勝吳廣大呼起兵而郡縣之吏熟視而走無敢誰何趙高擅權於內頗指如意雖李斯為相備五刑而死於道路其子李由守三川擁山河之固而不敢校也此二患者皆始於外之不足而無有以制之也至於漢興懲秦孤立之弊乃大封侯王而高帝之世反者九起其遺孽餘烈至於文景而為淮南濟北吳楚之亂於是武帝分裂諸侯以懲

大國之禍而其後百年之間王莽遂得以奮其志於天下而劉氏子孫無復齟齬魏晉之世乃益侵削諸侯四方微弱不復為亂而朝廷之權臣山林之匹夫常為天下之大患此數君者其所以制其內外輕重之際皆有以自取其亂而莫之或知也夫天下之重在內則為內憂在外則為外患而秦漢之間不求其勢之本末而更相懲戒以就一偏之利故其禍循環無窮而不可解也且夫天子之於天下非如婦人孺子之愛其所有也得

天下而謹守之不忍以分於人此匹夫之所謂智也而不知其無成者未始不自不分始故夫聖人將有所大定於天下非外之有權臣不足以鎮之也而後世之君乃欲去其爪牙剪其股肱而責其成功亦已過矣愚嘗以為天下之勢內無重則無以威外之彊臣外無重則無以服內之大臣而絕姦民之心此二者其勢相持而後成而不可一輕者也昔唐太宗既平天下分四方之地盡以沿邊為節度府而范陽朔方之軍皆帶甲十萬

上足以制夷狄之難下足以備匹夫之亂內足以禁大臣之變而其將率之臣常不至於叛者內有重兵之勢以預制之也貞觀之際天下之兵八百餘府而在關中者五百舉天下之衆而後能當關中之半然朝廷之臣亦不至於乘間釁以邀大利者外有節度之權以破其心也故外之節度有周之諸侯外重之勢而易置從命得以擇其賢不肖之才是以人君無征伐之勞而天下無世臣暴虐之患內之府兵有秦之關中內重之勢而

左右謹飭莫敢為不義之行是以上無逼奪之危而下
無誅絕之禍蓋周之諸侯內無府兵之威故陷於逆亂
而不能以自止秦之關中外無節度之援故脅於大臣
而不能以自立有周秦之利而無周秦之害形格勢禁
內之不敢為變而外之不敢為亂未有如唐制之得者
也而天下之士不究利害之本末猥以成敗之遺蹤而
論計之得失徒見開元之後彊兵之將皆為天下之大
患而遂以太宗之制為猖狂不審之計夫論天下論其

勝敗之形以定其法制之得失則不若窮其所由勝敗之處蓋天寶之際府兵四出萃於范陽而德宗之世禁兵皆戍趙魏是以祿山朱泚得至於京師而莫之能禁一亂塗地終於昭宗而天下卒無寧歲內之彊臣雖有輔國元振守澄士良之徒而卒不能制唐之命誅王涯殺賈餗自以為威振四方然劉從諫為之一言而震懼自斂不敢復肆其後崔昌遐倚朱溫之兵以誅宦官去天下之監軍而無一人敢與抗者由此觀之唐之衰其

弊在於外重而外重之弊起於府兵之在外非所謂制之失而後世之不用也

五代論

昔者商周之興始於稷卨而至於湯武凡數百年之間而後得志於天下其成功甚難而享天下之利至緩也然桀紂既滅收天下朝諸侯自處於天子之尊而下無不服之志誅一匹夫而天下遂定蓋其用力亦甚易而無勞也至於秦漢之際其英雄豪傑之士逐天下之利

惟恐不及而開天下之釁惟恐其後之也奮臂於大澤而天下之士雲合響應轉戰終日而辟地千里其取天下若此其無難也然天下已定君臣之分既明分裂海內以王諸將將以傳之無窮百世而不變而數歲之間功臣大國反者如蝟毛而起是何其取之之易而守之之難也若夫五代干戈之際其事雖不足道然觀其帝王起於匹夫鞭笞海內戰勝攻取而自梁以來不及百年天下五禪遠者不過數十年其智慮曾不足以及其

後世此亦甚可怪也蓋嘗聞之梁之亡其父子兄弟自相屠滅虐用其民而天下叛周之亡適遭聖人之興而不能以自立此二者君子之所不疑於其間也而後唐之莊宗明宗與晉漢之高祖皆以英武特異之姿據天下太半之地及其子孫材力智勇亦皆有以過人者然終以敗亂而不可解此其勢必有以自取之也蓋唐漢之亂始於功臣而晉之亂始於戎狄皆其以易取天下之過也莊宗之亂晉高祖以兵趨夷門而後天下定於

明宗後唐之亡匈奴破張達之兵而後天下定於晉匈奴之禍周高祖發南征之議而後天下定於漢故唐滅於晉晉亂於匈奴而漢亡於周蓋功臣負其創業之勲而匈奴恃其驅除之勞以要天子聽之則不可以久安而誅之則足以召天下之亂動一功臣天下遂並起而軋之矣故唐奪晉高祖之權而亡晉絕匈奴之和親而滅漢誅陽邠史肇而周人不服以及於禍彼其初無功臣無匈奴則不興而功臣匈奴卒起而滅之故古之聖

人有可以取天下之資而不用有可以乘天下之勢而
不顧撫循其民以待天下之自至此非以為苟仁而已
矣誠以為天下之不可以易取也欲求天下而求之於
易故凡事之可以就天下者無所不為也無所不為而
就天下天下既安而不之改則非長久之計也改之而
不顧此必有以忤天下之心者矣昔者晉獻公既沒公
子重耳在翟里克殺奚齊卓子而召重耳重耳不敢入
秦伯使公子絳往弔且告以晉國之亂將有所立於公

子重耳再拜而辭亦不敢當也至於夷吾聞召而起以汾陽之田百萬命里克以負蔡之田七十萬命丕鄭而奉秦以河外列城五及其既入而背內外之賂殺里克丕鄭而發兵以絕秦兵敗身虜不復其國而後文公徐起而收之大臣援之於內而秦楚推之於外既反而霸於諸侯唯其不求入而人入之無賂於內外而其勢可以自入此所以反國而無後憂也其後劉季起於豐沛之間從天下武勇之士入關以誅暴秦降子嬰當此之

時功冠諸侯其勢遂可以至於帝王此皆沛公之所自為而諸將不與也然至追項籍於固陵兵敗而諸將不至乃捐數千里之地以與韓信彭越而此兩人卒負其功背叛而不可制故夫取天下不可以僥倖於一時之利僥倖於一時之利則必將有百歲不已之患此所謂不及遠也

周公論

伊尹既立太甲不明而放諸桐天下不以為不義武王

既沒成王幼周公攝天子之位朝諸侯於明堂而召公
不說管叔蔡叔咸叛天下幾至於不救二者此其故何
也太甲既立矣而不足以治天下則夫伊尹猶有以辭
於後世也蓋周公之事其迹無以異於伊尹然天下之
人舉皆疑而不信此無足怪也何者天下未知夫成王
之不明而周公攝則是周公未有以服天下之心而彊
攝焉以為之上也且夫伊尹之攝其事則有所不得已
而然爾太甲雖廢而伊尹未敢有所復立以召天下之

亂故寧以己攝焉而待夫太甲之悔是以天下無疑乎其心今夫周公之際其勢未至於不得已也使成王拱手以居天下之上而周公為之佐以成王之名號於天下而輔之以周公此所謂其勢之未至於不得已者矣而周公不居則夫天下之謗周公之所自取也然愚以為不然挾天子以令天下此諸葛孔明之事耳而周公豈不足以知之蓋夫人臣惟無執天子之權人臣而執天子之權則必有忠於其心而後可以自免於難何者

人臣而用天子之事此天子之所忌也以一人之身上
為天子之所忌而下為左右之大臣從而媒孽其短此
古之忠臣所以盡心而不免於禍而世之奸雄之士所
以動其無君之心而不顧者也使成王用事於天下而
周公制其予奪之柄則愚恐成王有所不平於其心而
管蔡之徒乘其隙而間之以至於亂也使成王有天子
之虛名而不得制天下之政則愚恐周公有所不忍於
其志赧然其有不安之心也是以寧取而攝之使成王

無與乎其間以破天下讒慝之謀而絕其爭權之心是
以其後雖有管蔡之憂而天下不搖使其當時立於羣
臣之間方其危疑擾攘而未決也則愚恐周公之禍非
居東之所能免而管蔡得志於天下成王將遂不立也
嗚呼其思之遠哉

老聃論上

善與人言者因其人之言而為之言則天下之為辯者
服矣與其里人言而曰吾父以為不然則誰肯信以為

爾父之是是故不若與之論其曲直雖楚人可以与秦
人言之而無害故夫天下之所為多言以排夫異端而
終以不明者唯不務其是非利害而以父屈人也夫聖
人之所為尊於天下為其知夫理之所在也而周公仲
尼之所為信於天下以其弟子而知之也故非其弟子
則天下有不知周公之為周公而仲尼之為仲尼者矣
是故老聃莊周其為說不可以周孔辯也何者彼且以
為周孔之不足信也夫聖人之於言譬如規矩之於方

圓爾天下之人信規矩之於方圓而以規矩辯天下之
不方不圓則不若求其至方極圓以陰合於規矩使規
而有不圓矩而有不方則亦無害於吾說若此則其勢
易以折天下之異論昔者天下之士其論老聃莊周與
夫佛之道者皆未嘗得其要也老聃之說曰去仁義絕
禮樂而後天下安而吾之說曰仁義禮樂天下之所待
以治安者佛之說曰棄父絕子不為夫婦放雞豚食菜
茹而後萬物遂而吾之說曰父子夫婦食雞豚以遂萬

物之性夫彼且以其說而吾亦以吾說彼之不吾信如
吾之不彼信也蓋天下之不從莫急於未信而彊劫之
故夫仁以安人而行之以義節之以禮而播之以樂守
之以君臣而維之以父子兄弟食肉而飲酒此明於孔
子者之所知也而欲以諭其所不知之人而曰孔子則
然嗟夫難哉愚則不然曰天下之道唯其辯之而無窮
攻之而無間辯之而有窮攻之而有間則是不足以為
道果孔子而有窮也亦將舍而他之惟其無窮是以知

其為道而無疑蓋天下有能平其心而觀焉而不牽夫仲尼老聃之名而後可與語此也

老聃論下

天下之道惟其辯之而無窮攻之而無間辯之而有窮攻之而有間則是不足以為道昔者六國之際處士橫議以熒惑天下楊氏為我而墨氏兼愛凡天下之有以君臣父子之親而不相顧者舉皆歸於楊子而道路之人皆可以為父兄子弟者舉皆歸於墨子也夫天下之

人不可以絕其相屬之親而合其無故之歡此其勢然
矣故老聃莊周知夫天下之不從也而起而承之以為
兼愛為我之不足以收天下是以不為為我不為兼愛
而處乎兼愛為我之際此其意以為不兼愛則天下議
其無親不為我則天下譏其為人故兩無所適處而泛
泛焉浮游其間而我皆無所與以為是足以自免而逃
天下之是非矣夫天下之人惟是其所是而非其所非
是以其說可得而考其終今夫老莊無所是非而其終

歸於無有此其思之亦已詳矣楊氏之為我墨氏之兼
愛此其為道莫不有所執也故為我者為兼愛之所詆
而兼愛者為為我之所毀是二者其地皆不可居也然
而得其間而固守之則可以杜天下之異端而絕其口
蓋古之聖人惟其得而居之是以天下大服而其道遂
傳於後世今老聃莊周不得由其大道而見其隙竊入
於其間而執其機是以其論縱橫堅固而不可破也且
夫天下之事安可以一說治也彼二子者欲一之以兼

愛斷之以為我故其說有時焉而遂窮夫惟聖人能處
於其間而制其當然兼愛為我亦莫棄也而能用之以
無失乎道處天下之紛紜而不失其當故曰伯夷叔齊
不降其志不辱其身而柳下惠少連降志而辱身言中
倫行中慮虞仲夷逸隱居放言身中清廢中權我則異
於是無可無不可夫無可無不可比老聃莊周之所以
為辯也而仲尼亦云則夫老聃莊周其思之不可以為
不深矣蓋嘗聞之聖人之道處於不可不可之際而遂從

而實之是以其說萬變而不可窮老聃莊周從而虛之
是以其說汗漫而不可詰今將以求夫仲尼老聃之是
非者惟能知虛實之可用與否而已矣蓋天下固有物
也有物而物相遭則固亦有事矣是故聖人從其有而
制其御有之道以治其有實之事則天下夫亦何事之
不可為而區區焉平其有以納之於無則其用力不已
甚勞矣哉夫老聃莊周則亦嘗自知其窮矣夫其窮者
何也不若從其有而有之之為易也故曰常無欲以觀

其妙而又曰常有欲以觀其微既曰無之以為用而又
曰有之以為利而至於佛者則亦曰斷滅而又曰無斷
無滅夫既曰無矣而又恐無之反以為窮既曰斷滅矣
而又恐斷滅之適以為累則夫其情可以見矣仲尼有
言曰君子之中庸也君子而時中小人之中庸也小人
而無忌憚也夫老聃莊周其亦近於中庸而無忌憚者
哉

樂城應詔集卷三

欽定四庫全書薈要卷一萬五千八十三

集部

樂城應詔集卷四

宋 蘇轍 撰

進論五首

禮論

昔者商周之際何其為禮之易也其在宗廟朝廷之中
籩豆簠簋牛羊酒醴之薦交於堂上而天子諸侯大夫
卿士周旋揖讓獻酬百拜樂作於下而禮行於上雍容
和穆終日而不亂夫古之人何其知禮而行之不勞也

當此之時天下之人惟其習慣而無疑衣服器皿冠冕
佩玉皆其所常用也是以其人入於其間耳目聰明而
手足無所忤其身安於禮之曲折而其心不亂以能深
思禮樂之意故其廉恥退讓之心盎然見於其面而全
然發於其躬夫是以能使天下觀其行事而忘其暴戾鄙
野之氣至於後世風俗變易更數千年以至於今天下
之事已大異矣然天下之人尚皆記錄三代禮樂之名
詳其節目而習其俯仰冠古之冠服古之衣而御古之

器皿偃僂拳曲勞苦於宗廟朝廷之中區區而莫得其
紀交錯紛亂而不中節此無足怪也其所用者非其素
所習也而彊使焉甚矣夫後世之好古也昔者上古之
世蓋常有巢居穴處汙樽坏飲燔黍捭豚蕢桴土鼓而
以為是足以養生送死而無以加之者矣及其後世聖
人以為不足大利於天下是故易之以宮室新之以籩
豆鼎俎之器以濟天下之所不足而盡去太古之法惟
其祭祀以交於鬼神乃始薦其血毛豚解而腥之體解

而燭之以為是不忘本而非以為後世之禮不足用也是以退而體其犬豕牛羊實其簋簠簋豆鉶羹以極今世之美未聞其牽於上古之說選懦而不決也且方今之人佩玉服黼冕而垂旒拱手而不知所為而天下之人亦且見而笑之是何所復望於其有以感發天下之心哉且又有所大不安者宗廟之祭聖人所以追求先祖之神靈庶幾得而享之以安卹孝子之志者也是以思其平生起居飲食之際而設其器用薦其酒食皆從

其生以冀其來而安之而後世宗廟之祭皆用三代之器則是先祖終莫得而安也蓋三代之時席地而食是

以其器用各因其所便而為之高下大小之制今世之禮坐於牀而食於牀上是以其器不得不有所變雖正使三代之聖人生於今而用之亦將以為便安故夫三代之視上古猶今之視三代也三代之器不可復用矣而其制禮之意尚可依倣以為法也宗廟之祭薦之以血毛重之以體薦有以存古之遺風矣而其餘者可以

易三代之器而用今世之所便以從鬼神之所安惟其
春秋社稷釋奠釋菜凡所以享古之鬼神者則皆從其
器蓋周人之祭蜡與田祖也吹葦籥擊土鼓此亦各從
其所安焉耳嗟夫天下之禮宏闊而難言自非聖人而
何以處此惟其推之而不明講之而不詳則遂以為不
可蓋其近於正而易行庶幾天下之安而從之是固不
可易也

易論

易者卜筮之書也挾策布卦以分陰陽而明吉凶此日
者之事而非聖人之道聖人之道存乎其爻之辭而不
在其數數非聖人之所盡心也然易始於八卦而至於
六十四此其為書未離乎用數也而世之人皆恥言易
之數或者言而不得其要紛紜迂濶而不可解此高論
之士所以恥而不言歟夫易本於卜筮而聖人闡言於
其間以盡天下之人情使其為數紛亂而不可考則聖
人豈肯以其有用之言而託之無用之數哉今夫易之

所謂九六者老陰老陽之數也九為老陽而七為少陽
六為老陰而八為少陰此四數者天下莫知其所為如
此者也或者以為陽之數極於九而其次極於七故七
為少而九為老至於老陰苟以為以極者而言也則老
陰當十而少陰當八今少陰八而老陰反當其下之六
則又為之說曰陰不可以有加於陽故抑而處之於下
使陰果不可以有加於陽也而曷不曰老陰八而少陰
六且夫陰陽之數此天地之所為也而聖人豈得與於

其間而制其予奪哉此其尤不可者也夫陰陽之有老少此未嘗見於他書也而見於易易之所以或為老或為少者為夫揲著之故也故夫說者宜於其揲著焉而求之揲著之法曰掛一歸奇三揲之餘而以四數之得九而以為老陽得八而以為少陰得七而以為少陽得六而以為老陰然而陰陽之所以為老少者不在乎七八九六也七八九六徒以為識焉耳老者陰陽之純也少者陰陽之雜而不純者也陽數皆奇而陰數皆偶故

乾以一為之爻而坤以二天下之物以少為主故乾之
子皆二陰而坤之女皆二陽老陰老陽者乾坤是也少
陰少陽者乾坤之子是也揲著者其一揲也少者五而
多者九其二其三少者四而多者八多少者奇偶之象
也一爻而三揲譬如一卦而三爻也陰陽之老少於卦
見之於爻而於爻見之於揲使其果有取於七八九六
則夫此三揲者區區焉分其少多而各為之處果何以
為也今夫三揲而皆少此無以異於乾之三爻而皆奇

也三揲而皆多此無以異於坤之三爻而皆偶也三揲而少者一此無以異於震坎艮之一奇而二偶也三揲而多者一此無以異於巽離兌之一偶而二奇也若夫七八九六此乃取以為識而非其義之所在不可彊以為說也

書論

愚讀史記商君列傳觀其改法定令變更秦國之風俗誅秦民之議令者以數千人黥太子之師劓太子之傅

而後法令大行蓋未嘗不壯其勇而有決也曰嗟夫世俗之不可與慮始而可與樂終使天下之人各陳其所知而守其所學以議天子之事則事將有格而不得成者然及觀三代之書至其將有以矯拂世俗之際則其所以告諭天下者常丁寧激切疊疊而不倦務使天下盡知其君之心而又從而折其不服之意使天下皆信以為如此而後從事其言回曲宛轉譬如平人自相議論而詰其是非者愚始讀而疑之以為近於濡滯迂遠

而無決然其使天下樂從而無黽勉不得已之意其事
既發而無紛紜異同之論此則王者之意也故常以為
當堯舜之時其君臣相得之心歡樂而無間相與吁俞
嗟歎唯諾於朝廷之中不啻若朋友之親雖其有所相
是非論辯以求曲直之當亦無足怪者及至湯武征伐
之際周旋反覆自述其用兵之意以明曉天下此又其
勢然也惟其天下既安君民之勢闊遠而不同天子有
所欲為而其匹夫匹婦私有異論於天下以齟齬其上

之畫策令之而莫肯聽當此之時形驅而勢脅之天下
夫誰敢不聽從而其上之人優游而徐譬之使之信之
而後從此非王者之心誰能處而待之而不倦歟蓋盤
庚之遷天下皆咨嗟而不悅盤庚為之稱其先王盛德
明聖而猶五遷以至於今今不承於古恐天之斷棄汝
命不救汝死既又恐其不從也則又曰汝罔暨余同心
我先后將降汝罪疾乃祖先父亦將告我高后曰作大
戮於朕孫蓋其所以開其不悟之心而諭之以其所以

當然者如此其詳也若夫商君則不然以為要使汝獲其利而何卹乎吾之所為故無所求於衆人之論而亦無以告諭於天下然其事亦終於有成是以後世之論以為三代之治柔懦而不決然此乃王霸之所以為異者也夫三代之君惟不忍鄙其民而欺之故天下有故而其議及於百姓以觀其意之所向及其不可聽則又反覆而諭之以窮極其說而服其不然之心是以其民親而愛之嗚呼此王霸之所為不同也哉

詩論

自仲尼之亡六經之道遂散而不可解蓋其患在於責其義之太深而求其法之太切夫六經之道惟其近於人情是以久傳而不廢而世之迂學乃皆曲為之說雖其義之不至於此者必彊牽合以為如此故其論委曲而莫通也夫聖人之為經惟其於禮春秋然後無一言之虛而莫不可考然猶未嘗不近於人情至於書出於一時言語之間而易之文為卜筮而作故時亦有所不

可前定之說此其於法度已不如禮春秋之嚴矣而況乎詩者天下之人匹夫匹婦羈臣賤隸悲憂愉佚之所為作也夫天下之人自傷其貧賤困苦之憂而自述其豐美盛大之樂其言上及於君臣父子天下興亡治亂之迹而下及於飲食牀第昆蟲草木之類蓋其中無所不具而尚何以繩墨法度區區而求諸其間哉此亦足以見其志之不通矣夫聖人之於詩以為其終要入於仁義而不責其一言之無當是以其意可觀而其言可

通也今詩之傳曰隱其雷在南山之陽出自北門憂心
殷殷揚之水白石鑿鑿終朝采綠不盈一掬瞻彼洛矣
維水泱泱若此者皆興也而至於關關雎鳩在河之洲
南有樛木葛藟纍之南有喬木不可休息維鵲有巢惟
鳩居之嘒嘒草蟲趯趯阜螽若此者又皆興也其意以
為興者有所取象乎天下之物以自見其事故凡詩之
為此事而作而其言有及於是物者則必彊為是物之
說以求合其事蓋其為學亦以勞矣且彼不知夫詩之

體固有比也而皆合之以為興夫興之為言猶曰其意云爾意有所觸乎當時時已去而不可知故其類可以意推而不可以言解也隱其雷曰隱其雷在南山之陽此非有所取乎雷也蓋必其當時之所見而有動乎其意故後之人不可以求得其說此其所以為興也若夫關關雎鳩在河之洲是誠有取於其摯而有別是以謂之比而非興也嗟夫天下之人欲觀於詩其必先知夫興之不可以與比同而無彊為之說以求合其作時之

事則夫詩之義庶幾乎可以意曉而無勞矣

春秋論

事有以拂乎吾心則吾言忿然而不平有以順適乎吾意則吾言優柔而不怒天下之人其喜怒哀樂之情可以一言而知也喜之言豈可以為怒之言邪此天下之人皆能辨之而至於聖人其言丁寧反覆布於方冊者甚多而其喜怒好惡之所在者又甚明而易知也然天下之人常患求而莫得其意之所主此其故何也天下

之人以為聖人之文章非復天下之言也而求之太過
求之太過是以聖人之言更為深遠而不可曉且夫天
下何不以己推之也將以喜夫其人而加之以怒之之
言則天下且以為病狂而聖人豈有以異乎人哉不知
其好惡之情而不求其言之喜怒是所謂大惑也昔者
仲尼刪詩於衰周之末上自商周之盛王至於幽厲失
道之際而下訖於陳靈自詩人以來至於仲尼之世蓋
已數百餘年矣愚嘗怪大雅小雅之詩當幽厲之時而

稱道文武成康之盛德及其終篇又不見幽厲之暴虐
此誰知其為幽厲之詩而非文武成康之詩者蓋察於
辭氣有幽憂不樂之意是以系之幽厲而無疑也若夫
春秋二百四十二年之間天下之是非雜然而觸乎其
心見惡而怒見善而喜則夫是非之際又可以求諸其
言之喜怒之間矣今夫人之於事有喜而言之者有怒
而言之者有怨而言之者喜而言之則其言和而無傷
怒而言之則其言厲而不溫怨而言之則其言深而不

誠此其大凡也春秋之於仲孫湫之來曰齊仲孫來於季友之歸曰季子來歸此所謂喜之之言也於魯鄭之易田曰鄭伯以璧假許田於晉文之召王曰天王狩于河陽此所謂怒之之言也於叔牙之殺曰公子牙卒於慶父之奔曰公子慶父如齊此所謂怨之之言也夫喜之而和怒之而厲怨之而深此三者無以加矣至於公羊穀梁之傳則不然日月土地皆所以為訓也夫日月之不知土地之不詳何足以為喜而何足以為怒此喜

怒之所不在也春秋書曰戎伐凡伯于楚丘而以為衛
伐凡伯春秋書曰齊仲孫來而以為吾仲孫怒而至於
變人之國此又喜怒之所不及也愚故曰春秋者亦人
之言而已而人之言亦觀其辭氣之所嚮而已矣


樂城應詔集卷四

謹案應詔卷一第一頁前六行天下以為禹無聖人而傳之按三蘇文粹天下作後世

卷二第四頁後五行而我閉而拒之按宋文鑑閉下有門字

卷三第十頁後三行唯不務其是非利害按三蘇文粹務下有辯字

欽定四庫全書



總校官庶吉士臣張能照

校對官編修臣閔惇大

膳錄監生臣吳申嵐

欽定四庫全書薈要

集部

樂城應詔集卷

五至
七

詳校官助教

臣常循



欽定四庫全書薈要卷一萬五千八十四

集部

樂城應詔集卷五

宋 蘇轍 撰

進論五首

燕趙論

昔者三代之法使天下立學校而教民行鄉射飲酒之禮於歲之終田事既畢而會其鄉黨之耆老設其籩豆酒食之薦而天子之大夫親為之行禮蓋以為田野之民裸裎其股肱而勞苦其筋力長幼襍作以趨一時之

利習於鄙野之俗而不知孝悌之節頑嚚無恥不可告
語而易與為亂是以因其休息而教之以禮使之有所
不忘於其心故三代之民雖耕田荷任之賤其所有為
者甚鄙而其中必有所守其心甚朴而亦不至於無知
以犯非義何者其上之人不以為鄙而不足教而其民
亦喜於為善也至於後世之衰天下之民愚者不知君
臣父子之義而天下之風俗日已敗亂今夫輕揚而剽
悍好利而多變者吳楚之俗也勁勇而沉靖椎鈍而少

文者燕趙之俗也以輕揚剽悍之人而有好利多變之心無三代王者之化宜其起而為亂矣若夫北方燕趙之國其勁勇沉靖者可以義動而其椎魯少文者可以信結也然而燕趙之間其民常至於自負其勇以為盜賊無以異於吳楚者何也其勁勇近於好亂而其椎鈍近於無知上失其道而燕趙之良民不復見於當世而其暴戾之夫每每亂天子之治仲尼曰君子好勇而無義則為亂小人好勇而無義則為盜故古之聖人止亂

以義止盜以義使天下之人皆知父子君臣之義而誰
與為亂哉昔者唐室之衰燕趙之人八十年之間百戰
以奉賊臣竭力致死不顧敗亡以抗天子之兵而以為
忠臣義士之所當然當此之時燕趙之士唯無義也故
舉其忠誠專一之心而用之天下之至逆以拒天下之
至順而不知其非也孟子曰無常產而有常心者唯士
為能若夫民無常產因無常心苟無常心放僻邪侈無
不為已故夫燕趙之地常苦夫士大夫之寡也

蜀論

匹夫匹婦天下之所易也武夫任俠天下之所畏也天下之人知夫至剛之不可屈而不知夫至柔之不可犯也是以天下之亂常至於漸深而莫之能止蓋其所畏者愈驕而不可制而其所易者不得志而思以為亂也秦晉之勇蜀漢之怯怯者重犯禁而勇者輕為姦天下之所知也當戰國之時秦晉之兵彎弓而帶劒馳騁上下咄嗟叱吒蜀漢之士所不能當也然而天下既安秦

晉之間豪民殺人以報讐椎埋發冢以快其意而終不敢為大變也蜀人畏吏奉法俯首聽命而其匹夫小人意有所不適輒起而從亂此其故何也觀其平居無事盜入其室懼傷而不敢校此非有好亂難制之氣也然其弊常至於大亂而不可救則亦優柔不決之俗有以啓之耳今夫秦晉之民倜儻而無所顧負力而傲其吏吏有不善而不能以有容也叫號紛訟奔走告訴以爭毫釐曲直之際而其甚者至有懷刃以賊其長吏以極

其忿怒之節如是而已矣故夫秦晉之俗有一朝不測之怒而無終身感感不報之怨也若夫蜀人辱之而不能競犯之而不能報循循而無言忍詬而不驟發也至於其心有所不可復忍然後聚而為羣盜散而為大亂以發其憤憾不洩之氣故雖秦晉之勇而其為亂也志近而禍淺蜀人之怯而其為變也怨深而禍大此其勇怯之勢必至於此而無足怪也是以天下之民惟無怨於其心怨而得償以快其怒則其為毒也猶可以少解

惟其鬱鬱而無所洩則其為志也遠而其毒深故必有大亂以發其怒而後息古者君子之治天下彊者有所不憚而弱者有所不侮蓋為是也書曰無虐惇獨而畏高明詩曰不侮鰥寡不畏彊禦此言天下之匹夫匹婦其力不足以與敵而其智不足以與辯勝之不足以為武而徒使之怨以為亂故也嗟夫安得斯人者而與之論天下哉

北狄論

北狄之人其性果於擊刺便於射獵而習於馳騁生於
斥鹵之地長於霜雪之野飲水食肉風雨饑渴之所不
能困上下山坂筋力百倍輕死而樂戰故常以勇勝中
國然至於其所以擁護親戚休養生息畜牛馬長子孫
安居佚樂而欲保其首領者蓋無以異於華人也而中
國之士常憚其勇畏避而不敢犯氊裘之民亦以此恐
惕中國而奪之利此當今之所謂大患也昔者漢武之
世匈奴絕和親攻當路塞天下震恐其後二十年之間

漢兵深入不憚死亡捐命絕幕之北以決勝負而匈奴
孕重墮壞人畜疲弊不敢言戰何者勇士壯馬非中國
之所無有而窮追遠逐雖匈奴之衆亦終有所不安也
故夫敵國之盛非隣國之所深憂也要在養兵休士而
集其勇氣使之不懾而已方今天下之勢中國之民優
游緩帶不識兵革之勞驕奢怠惰勇氣消耗而戎狄之
賂又以百萬為計轉輸天下甘言厚禮以滿其不足之
意使天下之士耳熟所聞目習所見以為生民之命寄

於其手故俯首柔服莫敢抗拒凡中國勇健豪壯之氣
索然無復存者矣夫戰勝之民勇氣百倍敗兵之卒沒
世不復蓋所以戰者氣也所以不戰者氣之畜也戰而
後守者氣之餘也古之不戰者養其氣而不傷今之士
不戰而氣已盡矣此天下之所大憂者也昔者六國之
際秦人出兵於山東小戰則殺將大戰則割地兵之所
至天下震慄然諸侯猶帥其罷散之兵合從以擊秦砥
礪戰士激發其氣長平之敗趙卒死者四十萬人廉頗

收合餘燼北摧粟腹西抗秦兵振刷磨淬不自屈服故其民觀其上之所為日進而不挫皆自奮怒以爭死敵其後秦人圍趙邯鄲梁王使將軍新垣衍如趙欲遂帝秦而魯仲連慷慨發憤深以為不可蓋夫天下之士所為奮不顧身以抗彊虎狼之秦者為非其君也而使諸侯從而帝之天下尚誰能出身以拒其君哉故魯仲連非徒惜夫帝秦之虛名而惜夫天下之勢有所不可也今尊奉沙漠踈遠之人交歡納幣以為兄弟之國奉之

如驕子不敢一觸其意此適足以壞天下義士之氣而
畏夷狄豪橫之勢耳今誠養威而自重卓然特立不聽
夷狄之妄求以為民望而全吾中國之氣如此數十年
之間天下摧折之志復壯而北敵之勇非吾之所當畏
也

西戎論

戎狄之俗畏服大種而輕中國戎強則臣狄狄強則臣
戎戎狄皆弱而後中國可得而臣戎狄皆強而後侵略

之患不至於中國蓋一強而一弱中國之患也彼其弱者不敢獨戰是以爭附強國之餘威以趨利於中國而後無所懼强者并將弱國之兵蕩然南下而無復反顧之憂然後乃敢專力於中國而不去此二者以勢相從而不可間是以中國之士常不得解甲而息也昔者冒頓老上之盛惟西戎之無強國也故匈奴之人得以盡力而苦吾中國使西戎有武力戰勝之君則中國之禍將有所分而不專何者彼畏西戎之乘其後也故北狄

強則中國不得不厚西戎之君而西戎之君亦將自託於中國然而西戎非有強力自負之國則其勢亦將折而入於匈奴惟其國大而好勇其君之意欲區區自立於一隅而不畏北狄之衆而後中國可得而用也然天下之人皆以為北方有強悍不屈之匈奴而又重之以西戎之大國則中國將不勝其困此何其不思之甚也夫戎狄之人惟其愚陋而多怨是故可與共憂也惟其強狠而好勝是故可以激而壯也使之自相攻擊而不

能相下則其勢必走於中國中國因而收之而其不服者乃可圖也然天下之議又將以為戎狄之俗不喜自相攻鬪而喜擊中國之衆此其勢固不可得而合也蓋亦以為不然夫四夷之所以喜攻中國者為夫吾兵之不能苦戰而金玉錦繡之所交會也今使吾兵精而食足據險阻明烽燧吏士練習而不敢懈彼雖壯騎無所施設則其利不在於攻中國堅坐而相守不出十年彼外無所掠虜將不忍而熱中將反而求以相詬以為起

兵之名彼兵交於匈奴而怨結於中國則何以自固故中國舉而收之必將得其歡心然天下之心常畏其強而莫或收之而使為北狄之用此何其不識戎狄之情也

西南夷論

古者九夷八蠻無大君長紛紛籍籍不相統制惟北狄之種常為大國以抗中夏然蠻夷之俗種姓分別千人為部百家為黨見利則聚輕合易散族類不一其心終

莫相愛故其兵利於疾戰而不利於遲久北狄之人繇地十里控弦百萬侯王君長通為一家人畜富庶蔓延山谷之間其心常有所愛重而不忍去故其兵利於遲久而不利於疾戰此二者其大小之勢各有所便宜乎中國之所以待之者各有道也今夫北狄之人伏於陰山之下養兵休士久居而不戰此其志豈嘗須臾忘中國也然其心以為戰而勝人猶不若不戰而屈人之兵戰而不勝民之死者未可知也故常大言虛喝而不進

以謀弊中國蓋其所愛者愈大故其謀之愈深而發之
愈緩以求其不失也若夫西戎南蠻西南夷之民悉其
衆庶尚不能當狄人之半而其酋豪每每為亂不能自
禁此誠無愛於其心而僥倖於一戰以用其烏合之衆
而已故夫蠻夷之人擾邊求利其中非有大志者其類
皆可以謀來也愚嘗觀於西南徼外以臨蠻夷之衆求
其所以為變之始而遂至於攻城郭殺人民縱橫放肆
而不可救者其積之莫不有漸也夫蠻夷之民寧絕而

不之通今邊鄙之上利其貨財而納之於市使邊民凌侮欺謾而奪其利長吏又以為擾民而不之禁窮恚無聊莫可告訴故其勢必至於解讐結盟攻剽蹂踐殘之於鋒鏑之間而後其志得伸也嗟夫為吏如此亦見其不知本矣通關市戢吏民待之如中國之人彼尚誰所激怒而為此哉然事不患乎不知而患乎人之不能用昔班超處西域數十年西破龜茲北伏匈奴及將東歸或以為必有奇謀乃就問其計然其言止曰察見淵中

魚不祥屯戍之士皆非忠臣孝子不可盡繩以法當是
時莫不皆笑以為不足用然及西域之亂終亦以此故夫
謀非必奇而後可用而在乎當否而已古者四夷皆置校
尉而益州有蠻夷騎都尉以治其事使其強者不能內
侵而弱者不為中國之所侮蓋為是也

樂城應詔集卷五

欽定四庫全書薈要卷一萬五千八十五

集部

樂城應詔集卷六

宋 蘇轍 撰

進策五道

君術

第一道

臣聞天下之事非宰相不可盡行非諫官不可盡言天下之人誰能必至於諫官宰相者惟其少而學之長而欲行之終其身而不當其位不可以侵官而求盡其意

是故士大夫之間猶有不能自盡其才於天子者也今臣幸而生於天下無事之時每一間歲天子常詔兩制之大臣使舉天下之士上自登朝之吏而下至於山林之匹夫咸得竭其所懷以盡天下之利害非天子出納耳目之官而得以言萬民之情偽非天子黜陟賞罰之臣而得以論百官之長短非天子武力將帥之士而得以議兵革之強弱非天子錢穀大農之吏而得以權財用之多少蓋天下之人必其為宰相諫官而後可以盡

行而盡言者使之一旦得以詳數而悉說之此有以見天子之意所以待之者甚重而不輕也而臣何敢以無說而處於此臣常以為天下之事雖其甚大而難辦者天下必有能辦之人蓋當今之所為大患者不過曰四夷強盛而兵革不振百姓凋弊而官吏不飭重賦厚斂而用度不足嚴法峻令而姦軌不止此數四者所以使天子坐不安席中夜太息而不寐者也然臣皆以為不足憂何者天下必有能為天子出力而為之者而臣之

所憂在乎天下之所不能如之何者也臣聞善治天下者必明於天下之情而後得御天下之術術者所謂道也得其道而以智加焉是故謂之術古之聖人惟其知天下之情而以術制之也萬物皆可得而役其生皆可得而制其死牛服於箱馬服於轅鷹隼服於韝牛不可以有所觸馬不可以有所踉鷹隼不可以背而高翔此三者惟其喜怒好惡之情發於外而見於人也是以因其所忌而授之以其術至於終身制於人而不去且治

天下何異於治馬也馬之性剛狠而難制急之則弊而
不勝緩之則惰而不趨王良造父為之先後而制其遲
速驅之有方而掣之有時則終日驥驥而不知止此術
之至也古之聖人驅天下之人而盡用之仁者使効其
仁勇者使効其勇智者使効其智力者使効其力天下
之人雖襍然皆列於前安得仁人君子而後任之且雖
有天下之善人與之處而不知其情御之而不中其病
則雖有好善之心而不獲好善之利何者彼不徒為吾

用也而況乎天下之英雄欲收其功而不制其心哉昔者秦漢之際姦宄猛悍之人所在而為寇高祖發於豐沛之間行而收之黥布彭越之倫皆撫而納諸其中所以制之者甚備也玉帛子女牛羊犬馬以極其奢侈之心輕財好施敦厚長者以服其趯趯之懷倨肆傲岸輕侮凌辱以折其強狠之氣其視天下之英雄不啻若匹夫孺子然皆得其歡心而用其死力至於元成之世天下久於太平士大夫生於其間無復英雄難制之風天

下之士皆書生好儒其才氣勇力無足畏者俛首下氣
求為之用而不暇元成哀平亦欲得天下之賢才而用
之然而不知其情不獲其術賢人君子避讒畏譏遠引
而去而小人宦豎縱橫放肆而制其事此甚可憫也夫
人之平居朋友之間僕妾之際莫不有術以制其變蓋
非有深遠難見之事也欲其用命而見其所害欲其樂
從而見其所利欲其喜而致其所悅欲其懼而致其所
忌欲其開心見誠而示之以無所恐欲其守死不去而

示之以無所往此天下之人皆能知之而至於治天下則不能用且此過矣天下以為天子之尊無所事術也而不知天下之事惟其英雄而後能有大功而世之英雄常苦豪橫太過而難制由此觀之治天下愈不可以無術也

第二道

臣聞將求御天下之術必先明於天下之情不先明於天下之情則與無術何異夫天下之術臣固已畧言之

矣而又將竊言其情今使天子皆得賢人而任之雖可
以無憂乎其為姦然猶有情焉而不可以不知蓋臣聞
之人有好為名高者臨財推之以讓其親見位去之以
讓其下進而天子禮焉則以為歡而不禮焉則雖逼之
而不食其祿力為廉恥之節以高天下若是而天子不
知焉而豢之以厚利則其心赧然有所不平人有好為
厚利者見祿而就之以優其身見利而取之以豐其家
良田大屋惟其與之則可以致其才如是而天子不知

焉而強之以名高則其心缺然有所不悅於其中人惟
無好自勝也好自勝而不少柔之則忿鬪而不和人惟
無所相惡也有所相惡而不為少避之則事其私怒而
不求成功素剛則無折之也素畏則無強之也強之則
將不勝而折之則將不振凡此數者皆所以求用其才
而不傷其心也然猶非所以制天下之姦雄蓋臣聞之
天下之姦雄其為心也甚深而其為迹也甚微將營其
東而形之於西將取其右而擊之於左古之人有欲得

其君之權者不求之其君也優游翱翔而聽其君之所
欲為使之得其所欲而油然自放以釋天下之權天下
之權既去其君而無所歸然後徐起而收之故能取其
權而其君不之知古之人有為之者李林甫是也夫人
之既獲此權也則思專而有之故常恐其下之人從而
傾焉夫人惟能自固其身而後可以謀人自固之不暇
而欲謀人也實難故古之權臣常合天下之爭天下且
相與爭而不解則其勢無暇及我是故可以久居而不

去古之人有為之者亦李林甫是也世之人君苟無好善之心幸而有好善之心則天下之小人皆將賣之以為姦何者有好善之名而不察其善之實天下之善固有可以謂之惡而天下之惡固有可以謂之善者彼知吾之欲為善也則或先之以善而終之以惡或有指天下之惡而飾之以善古之人有為之者石顯是也人之將欲為此釁也將欲建此事也必先得於其君欲成事而君有所不悅則事不可以成故古之姦雄劫之以其

所必不能其所必不能者不可為也則將反而從吾之
所欲為古之人有為之者驪姬之說獻公使之說而避
禍是也此數者天下之至情故聖人見其初而求其終
聞其聲而推其形蓋惟能察人於無故之中故天下莫
能欺何者無故者必有其故也古者明王在上天下之
小人伏而不見夫小人者豈其能無意於天下也舉而
見其情發而中其病是以愧恥退縮而不敢進臣欲天
子明知君子之情以養當世之賢公名卿而深察小人

之病以絕其自進之漸此亦天下之至明也

第三道

臣聞天子之道可以理得而不可以名推其於天下不取其形而獨取其意其道可以為善而亦可以為不善何者其道無常其道無常者不善之所從生也夫天下之人惟知不忍殺人之為仁也是故不忍殺人以自取不仁之名惟知果於殺人之為義也是故不敢不殺以自取不義之名是二者其所以為仁者有形而其所以

為義者有狀其進也有所執其規而其退也有所蹈其矩故其為人也不失為天下之善人而終不至於君子有所甚而不堪有所蔽而不見此其為人是自全之人也今夫君子有所殺人以為仁而有所不殺以為義義不在於殺人而仁不在於不殺其進也無所據依而其退也無所底厲故其成也天下將皆安之而其不成也將使天下至於大亂是以天下惡其難明而畏其難就人臣以是戒其君而人君者亦以自戒曰姑為無殺人

以為仁而姑為果於殺人以為義是其仁可以全身而
其義可以無謫於天下斯足以為無過也已矣孟子有
言曰責難於君謂之恭陳善閉邪謂之有禮而謂吾君
不能者謂之賊且夫為人臣而詔其君不曰必為大人
之仁義而曰姑為其易者以苟避天下之謫此非恐其
君不能之故歟蓋臣聞之聖人之道惟其不可以名稱
而迹求者其為道也甚深而難成而其成也亦不若小
道之淺而無功所御甚廣而所處甚約握之甚微而播

之無極故孔子曰吾非多學而識之吾一以貫之夫一者何也知天下萬物之理而制其所當處是謂一矣而能得吾一者甚難故夫天下之畏之者亦不足怪也古之聖人已能知之則行之而無疑己不能知之則不敢以己之私意而破天下之公義使己而不好殺人則安可盡無殺以成仁之形使己而好殺人則安可盡殺以成義之狀蓋必有大臣救其己甚而補其不足使義不在於殺人而仁不在於不殺方今天下之治所不足者

非仁也吏聞有以入人之罪抵重罰而未聞有以失人之罪抵深法者民聞有以赦除其罪而未聞有以不義得罪於法之外者此亦足以見天子之用心矣古者君臣之間和而不同上有寬厚之君則下有守法之臣上有急切之君則下有推恩之臣凡以交濟其所不足而彌縫其闕今也君臣之風上下如一而無以相濟是以天下苦於寬緩怠惰而不能自振此豈左右之大臣務以順從上意為悅而豈亦天子自信以為好仁之美而

不喜臣下之有所矯拂哉方今之制易於行賞而重於用罰天下之以獄上者凡與死比則皆蹙頞而不悅此其為意夫豈不善然天下之姦人無以深懲而切戒之者此無乃為仁而至於不仁歟臣愚以為輔君之善而補其不足此誠大臣之事苟天子自信以為善欲以一人之私好而破天下之公義則夫大臣者猶不可為也惟知天子之仁義而無務其迹以成匹夫之節使大臣得參於其間而救其所短此不亦近於天子之道歟

第四道

臣聞古者君臣之間相信如父子相愛如兄弟朝廷之中優游悅懌歡然相得而無間知無所不言言無所不盡開心平意表裏洞達終身而不見其隙當此之時天下之人出身以事君委命於上而無所憂懼安神定氣以觀天下之政蕩然肆志有所欲為而上不見忌其所據者甚堅而無疑是以士大夫皆敢進而搏天下之大功至於後世君臣相虞皆有猜防之憂君不敢以其誠

心致諸其臣而臣亦不敢直己以行事二者相與齟齬而不相信上下相顧鯁鯁然而不能以自安而尚何暇及於天下之利害故天下之事每每擾敗而無所成就臣竊傷之而以為其蔽在於防禁之太深而督責之太急夫古之聖人至嚴而有所至寬至易而有所至險使天下有所易信而有所不可測用之各當其處而不失節是以天下畏其嚴而樂其寬至於後世之君徒知天下之不可以甚寬也而用之其君臣之際使其公卿大

臣終日憂懼不得安意肆志以自盡於其上而以為畏
威徒知天下之不可甚嚴也而用之其法律之事使其
天下之官吏欺其長上得以苟免取容不畏天子之法
而以為行惠蓋其所以用之之術甚悖而不順者至於
如此夫天下之人上自百官而下至於庶民其為數安
可窮盡而天子者以其一身寄乎其中論其衆寡之勢
則天下至衆而天子至寡論其智詐巧偽之術則天下
之衆固必有過於天子者吾欲臨之以天子之威則彼

有畏憚而不敢言多為之堤防以御其變詐則彼之智將有以出於堤防之所不能及是以古之聖人推之以至誠而御之以至威容之以至寬而待之以至易以君子長者之心待天下之士而不防其為詐談笑議論無所不及以開其歡心故天下士大夫皆欣然而入於其中有所愧恥而不忍為欺詐之行力行果斷而無憂懼不敢之意其所任用雖其兄弟朋友之親而不顧徇私之名其所誅戮雖其讐怨睚眦之人而不卹報怨之嫌

何者君臣相信之篤此所謂至嚴而有所至寬者也然至大吏縱橫放肆犯法而無所忌天下之所指目律令之所當取則雖天子有所不可輒釋使之一入而不可解而後天下知有所畏此所謂至易而有所至險二者其事不同而相與為用夫是以至寬而天下無頽惰靡弛之風至險而君臣無猜防逼迫之慮夫惟能通其君臣之歡而盡行其刑法之所禁而後可以及此也

第五道

臣聞事有若緩而其變甚急者天下之勢是也天下之人幼而習之長而成之相咻而成風相比而成俗縱橫顛倒紛紛而不知以自定當此之時其上之人刑之則懼驅之則聽其勢若無能為者然及其為變常至於破壞而不可禦故夫天子者觀天下之勢而制其所向以定其所歸者也夫天下之人弛而縱之拱手而視其所為則其勢無所不至其狀如長江大河日夜渾渾趨於下而不能止抵曲則激激而無所洩則咆哮潰亂蕩然

而四出壞堤防包陵谷汗漫而無所制故善治水者因其所入而導之則其勢不至於激怒壅涌而不可收既激矣又能徐徐而洩之則其勢不至於破決蕩溢而不可止然天下之人常狎其安流無事之不足畏也而不為去其所激觀其激作相感潰亂未發之際而以為不至於大懼不能徐洩其怒是以遂至橫流於中原而不可卒治昔者天下既安其人皆欲安坐而守之循循以為敦厚默默以為忠信忠臣義士之氣憤悶而不得發

豪俊之士不忍其鬱鬱之心起而振之而世之士大夫
好勇而輕進喜氣而不懾者皆樂從而羣和之直言忤
世而不顧直行犯上而不忌今之君子累累而從事於
此矣然天下猶有所不從其餘風故俗猶衆而未去相
與抗拒而勝負之數未有所定邪正相搏曲直相犯二
者潰潰而不知其所終極蓋天下之勢已小激矣而上
之人不從而遂決其壅臣恐天下之賢人不勝其忿而
自決之也夫惟天子之尊有所欲為而天下從之今不

爲決之於上而聽其自決則天下之不同者將悻然而不服而天下之豪俊亦將奮踴不顧而決之發而不中故大者傷小者死橫潰而不可救譬如東漢之士李膺杜密范滂張儉之黨慷慨議論本欲矯拂世俗之弊而當時之君不爲分別天下之邪正以快其氣而使天下之士發憤以自決之而天下遂以大亂由此觀之則夫英雄之士不可以不少遂其意也是以治水者唯能使之日夜流注而不息則雖有蛟龍鯨鯢之患亦將順流

奔走奮迅悅豫而不暇及於為變苟其緒畜渾亂壅閉而不決則水之百怪皆將勃然放肆求以自快其意而不可禦故夫天下亦不可不為少決以順適其意也

樂城應詔集卷六